

新昌 呂安世原輯
紹興 蔡東帆增訂

五冊

中華全史通俗演義

上海大東書局發行

中華全史通俗演義卷五

新昌 呂撫 安世 原輯 紹興 蔡成 東帆 增訂

第二十九回 朱溫起號梁朝歸於李氏

詩曰 山自青青水自流 南征北戰幾時休 青春壯士邊關老 紅粉佳人白了頭

却說德宗初政雖美而有美中不足。雖勵精圖治而性猜忌刻薄。以強明自任。恥見屈於忠言正論。而受欺於奸諂諛佞。先用楊炎為相。專以報復恩仇為事。初安史之亂。天下戶口什亡八九。所在宿重兵。其費不貲。皆倚辦於劉晏。晏為戶部尚書。有精力多機智。變通有無。曲盡其妙。唐之所以得中興。軍旅不至匱乏者。晏之力也。晏與楊炎有隙。貶為忠州刺史。荆南節度使庾準希楊炎旨。誣以怨望。上密遣中使縊殺之。天下冤之。於是大臣人人不自保。朝野側目。上惡炎欲誅之。乃擢盧杞為相。杞貌醜。色如藍。有口辨。陰險狡滑無比。知上性多猜忌。因以疑似離間羣臣。始勸上以嚴刻御下。中外失望。術士桑道茂上言。陛下不出數年。暫有離宮之厄。臣望奉天有天子氣。宜高大其城。以備非常。試以小事皆能先知。上乃命京兆發丁夫數千。併六軍之事。築奉天城。初成。德節度使李寶臣與淄青節度使李正己。魏博節度使田承嗣相結。期以土地傳之子孫。故田承嗣之死。寶臣力為之請。於朝。使以節授田悅。代宗從之。至是田悅屢為寶臣子惟岳請繼襲。上欲革前弊。不許。悅乃與李正己各遣使詣惟岳。謀勒兵拒命。河南士民騷動。李惟岳反。上命張孝忠朱滔等討之。惟岳將王武俊

殺之以降。成德遂平。滔請深州不許。武俊欲得節度使。不得。由是怨望。田悅聞之。各遣使說朱滔王。武俊約以合謀同反之利。得以傳之子孫。二人皆喜。從之。遂合兵反。平盧節度使李正己卒。子納擅領軍務。請襲位。上不許。亦反。於是朱滔自稱冀王。田悅自稱魏王。王武俊稱趙王。李納稱齊王。上以淮西節度使李希烈兼平盧節度使。討李納。希烈帥所部移鎮許。即與納通謀。自稱天下都元帥。希烈陷汝州。盧杞惡顏真卿欲殺之。言於上。以真卿名重海內。使之宣慰。招諭李希烈。真卿至。許希烈欲降之。百計窘之。真卿終不為屈。遂縊殺之。李希烈寇襄城。初上優恤士卒。每出境。加給酒肉。本道糧仍給其家。一人兼三人之給。軍士利之。各出軍。纔踰境而止。月費錢百三十餘萬緡。常賦不能供。乃稅間架。除陌錢。以益之。稅間架者。每屋二架為一間。上屋稅錢二千。中稅一千。下稅五百也。除陌錢者。凡賣買。每緡官稅五十錢。其隱錢與無價同。且加之罪也。於是愁怨之聲。盈於遠近。又不能給。遂無以善其後。上發涇原等道兵救襄城。涇原節度使姚令言將兵五千至京師。軍士冒雨寒甚。多攜子弟而來。冀得厚賜。遺其家。既至。一無所賜。發至滌水。詔京兆尹王翬犒師。惟糲食菜餒。眾怒。蹴而覆之。因揚言曰。吾輩將死於敵。而食且不飽。安能以微命拒白刃耶。聞瓊林太盈兩庫金帛盈溢。不如相與取之。乃擐甲張旗鼓噪。還趨京師。初神策軍使白志貞掌招募禁兵。東征死亡者。志貞皆隱不以聞。但受市井富兒賂而補之。名在軍籍。受給賜。而身居市廛。為販鬻。至是上召禁兵以禦賊。竟無一人至者。賊已斬關而入。上乃與王貴妃。韋淑妃。太子諸王。自苑北門出。宦官左右僅百人以

從翰林學士姜公輔叩馬言曰。朱泚嘗為涇帥。今廢處京師。心常快快。若亂兵奉以為主。則難制矣。請召使同行。上曰。無及矣。姚令言因與亂兵謀曰。今眾無主。不能久。朱太尉閑居私請。相與奉之。第眾許諾。乃遣數百騎迎朱泚於晉昌里第。泚入宮。居含元殿。自稱權知六軍。上至咸陽。思桑道茂之言。乃幸奉天。文武之臣。稍稍繼至。左金吾大將軍渾瑊至奉天。瑊素有威望。眾心恃之稍安。朱泚自稱大秦皇帝。尋改國號曰漢。大殺唐宗室之在長安者。以絕人望。帥師犯奉天。李晟將兵入援。朱泚攻圍奉天經月。城中資糧俱盡。李懷光以兵五萬入援。與李晟合。遣間入城奏上。上大喜。城中歡聲如雷。懷光敗泚兵於醴泉。渾瑊擊朱泚。破走之。泚遁歸長安。眾以為懷光復三日不至。則城不守矣。李懷光自山東來赴難。數與人言盧杞趙瑣及宦官白志貞之姦佞。且曰。吾見上當請誅之。既解奉天之圍。自矜其功。謂上必接以殊禮。或以懷光之言告盧杞。杞懼。言於上。宜使懷光乘勝取長安。不必入朝。稽留時日。上以為然。詔懷光直引軍屯便橋。與李晟刻期共取長安。懷光自以數千里竭誠赴難。破朱泚解重圍。而咫尺不得見天子。意殊怏怏。曰。吾今已為奸臣所排。事可知矣。遂引兵去。至魯店。留二日乃行。初上在東宮。聞監察御史陸贄名。及即位。召為翰林學士。至是因亂。數問以時事得失。贄於政治時務。懇懇直陳。上頗用其言。中外賴之。李懷光屯兵不進。數上表。暴揚盧杞等罪惡。眾論喧騰。亦咎杞等。上不得已。貶盧杞趙瑣白志貞為遠州司馬。上下詔大赦。王武俊田悅李納見赦。皆去王號。上表謝罪。惟李希烈自恃兵強財富。遂即皇帝位。國號大楚。李懷光既脇朝廷逐盧杞。

等內不自安。遂有異志。又惡李晟獨當一面。恐其成功。奉請與晟合軍。詔許之。懷光屯咸陽累日。逗留不進。密與朱泚通謀。事迹頗露。李晟屢奏。以為懷光反狀已明。恐一旦有變。為其所併。請移軍東渭橋上從之。詔加懷光太尉。賜鐵券。遣使諭旨。懷光對使者投鐵券於地。曰。人臣反。賜鐵券。懷光不反。今賜鐵券。是使之反也。辭氣甚悖。懷光潛與朱泚通。其養子石演芬遣客詣行在告之。事覺。懷光責之曰。我以爾為子。奈何負我。演芬曰。演芬胡人。惟知事一人。苟免賊名而死。死甘心矣。懷光使左右鬻食之。皆曰。義士也。以刀斷其喉而去。懷光遣其將趙丹鸞入奉天。渾瑊聞之。遽請上急幸梁州。上從之。除李晟河中同絳節度使。加平章事。晟得除官制。拜哭受命。謂將佐曰。長安宗廟所在。天下根本。晟若行。誰當滅賊者。乃治城隍。繕甲兵。為復京城之計。是時懷光朱泚連兵。聲勢甚盛。車駕南幸。人人擾擾。晟以孤軍處二強寇之間。內無資糧。外無救援。徒以忠義感激將士。故其眾雖單弱。而銳氣不衰。初懷光方強。朱泚畏之。與懷光書以兄事之。及懷光既反。逼乘輿南幸。其下多叛之。勢漸弱。泚乃賜懷光詔書。以臣禮待之。且徵其兵。懷光漸怒。遂燒營東走河中。將士在道散亡相繼。李晟家口及神策軍士家屬皆在長安。朱泚善遇之。軍中有言及家者。晟泣曰。天子何在。敢言家乎。泚使晟親近。以家書遺晟。曰。公家無恙。晟怒曰。爾敢為賊間。立斬之。軍士未授春衣。盛夏猶衣裘褐。終無叛志。渾瑊帥諸軍屯奉天。與李晟東西相應。以逼長安。韓滉在江東。遣使貢獻運米百萬斛。以獻朝廷。又運米百艘。以餉李晟。李晟大陳兵。諭以收復京城。遂引兵至通化門外。泚兵大至。晟縱兵擊之。

賊敗走。再戰。又破之。賊衆大潰。姚令言帥衆西走。晟屯於含光殿前。使掌書記于公異作露布詣行在。朱泚將奔吐蕃。其衆隨道散亡。至彭原西城。其將梁庭芬等斬之以降。傳首行在。朱泚亂凡二年。車駕至長安。李晟見上。先賀平賊。後謝收復之晚。以李晟為鳳翔隴右節度使。進爵西平王。時年連旱蝗。度支資糧匱竭。言事者多請赦李懷光。李晟上言。懷光有五不可赦。馬燧入朝。奏曰。懷光凶逆尤甚。赦之無以號令天下。願更得一月糧。必為陛下平之。上許之。燧以長春宮守備甚嚴。長春宮不下。則懷光不可得。乃徑造城下。呼其守將徐庭光曰。汝曹徇國立功四十餘年。何忽為滅族之計。從吾言。非止免禍。富貴可圖也。反叛皆懷光所為。汝曹無罪。第堅守勿出。衆皆曰。諾。乃開門降。燧以數騎入城。慰撫之。其衆大呼曰。吾輩復為王人矣。燧等引軍直逼河中。懷光舉火。諸營不應。河中軍士自相驚恐。須臾皆易其號為太平字。懷光不知所為。乃縊而死。將士斬其首以降。燧自辭行至河中。平。凡二十七日。初懷光之解奉天圍也。上以其子李璣為監察御史。及懷光屯咸陽不進。璣密言於上曰。臣父必負陛下。願早為之備。上驚曰。卿大臣愛子。當為朕委曲彌縫之。對曰。臣父非不愛子。臣非不愛其父。與宗族也。願臣力竭無能回也。上曰。然則卿以何策自免。對曰。臣父敗。則臣與之俱死。復何策哉。使臣賣父求生。陛下亦安所用之。及懷光死。璣即自殺。上以璣故。詔赦懷光一子。收葬其屍。李希烈在蔡州。兵勢日熾。會有疾。大將陳仙奇使醫生陳山甫毒殺之。舉衆來降。希烈亂凡五年。詔以仙奇為淮西節度使。未幾。仙奇為其將吳少誠所殺。上亦即以少誠為留後。吐蕃入寇。李晟遣

兵擊敗之。其主尚結贊謂人曰：唐之良將，李晟、馬燧、渾瑊而已。當以計去之。乃遣使求和於馬燧。燧信其言，為之請於朝。李晟曰：戎狄無信，不如擊之。燧與張延賞皆與晟有隙，欲反其謀，爭言和親便。上計遂決。上蕃尚結贊請和，欲得渾瑊為會盟使。乃詐誘之曰：渾瑊侍中信厚，聞於異域，請必使之主盟。瑊發長安，李晟深戒之，以為盟所不可不嚴備。張延賞言於上曰：晟不欲盟好之成，故戒瑊以嚴備。我有疑彼之形，則彼亦疑我矣。盟何由成？上乃召瑊，切戒以推誠待虜，勿為猜疑。渾瑊表奏吐蕃決於辛未日盟。上大喜，以表誇示羣臣。辛未將盟，吐蕃伏精騎數萬於壇西。瑊等皆不知，入幕易禮服。吐蕃伐鼓三聲，大噪而至。瑊自幕後出，偶得他馬乘之而遁。唐將卒皆東走。吐蕃縱兵追擊，或殺或擒之。是日上與羣臣方慶盟誓得成，乃社稷之福。惟柳渾深以為憂。李晟曰：誠如渾言，上變色不悅而罷。是夕，韓遊瓌表言虜劫盟，上大驚。明日謂柳渾曰：卿書生，乃能料敵如此之審耶？初，吐蕃尚結贊惡李晟、馬燧、渾瑊，曰：去此三人，則唐可圖也。於是離間李晟。因馬燧以求和，欲執渾瑊以責燧，使並獲罪。因縱兵直犯長安，會失渾瑊而止。上以李泌同平章事，泌有謀略，諳練軍國之事。歷事三朝，因事納諫，為益弘多。且善調停，上於君臣父子之間，順宗之不廢，泌之力也。然好仙術，不畜家室。既力辭還山而復出相，此其所短也。上於亂時，頗能信用。李泌、陸贄之言，及亂稍定，李泌復卒，遂罷陸贄。而用裴延齡等，又猜忌輕聽，而好聚斂，治否各半。上在位二十六年崩。太子誦立，是為順宗。時順帝失音，不能決事，常居深宮，施簾帷，獨宦官李忠言、昭容牛氏侍左右。百官奏事，自帷中可其奏。

王伾王叔文韓泰柳宗元劉禹錫等用事。西川節度使韋臯表請太子監國。上傳位於太子純。在位一年。自稱太上皇。太子即位。是為憲宗。貶王伾王叔文等。帝剛明果斷。能用忠謀。西川節度韋臯卒。劉闢自為留後。求節鉞。上以初嗣位。力未能討。許之。闢益驕。求兼領三川。上不許。遂發兵反。圍東川。衆以地險難取。杜黃裳獨請討之。力薦高崇文為將。崇文長驅直指成都。所向崩潰。遂克成都。擒劉闢。送京師斬之。市肆不驚。一境皆平。杜黃裳裴度相繼為相。上嘗與宰相論治道於延英殿。日昃暑甚。汗透御服。宰相恐上體倦。求退。上留之曰。朕入宮中。所與處者。獨宮人宦官耳。故樂與卿等且共談為治之要。殊不知倦也。時上處置得宜。諸藩鎮逆命者。多畏威懷德。歸順朝廷。惟彰義即淮西節度使吳少誠卒。吳少陽自為留後。及少陽卒。其子吳元濟匿喪。自領軍務。上以李光顏為節度使。嚴授為招撫使。督諸道兵討吳元濟。諸軍討淮西久未有功。衆請罷征。惟裴度言彰義必可取之。狀上以度為相。悉以兵事委之。討賊愈急。以李晟子李愬為唐鄧隨節度使。愬謀襲蔡州。遣馬少良將十餘騎巡邏。遇吳元濟捉生虞候丁士良與戰。擒之。愬命釋其縛。給其衣服器械。署為捉生將士。良言於愬曰。吳秀琳擁三千之衆。據文城柵。為賊左臂。官軍不敢近者。有陳光洽為之謀主也。光洽勇而輕。好自出戰。請為公先擒光洽。則秀琳自降矣。遂擒光洽以歸。秀琳果以柵降。愬引兵入據其城。愬與秀琳謀取蔡。秀琳曰。公欲取蔡。非得李祐不可。如秀琳無能為也。會祐帥士卒刈麥於張柴村。愬使廂虞候史用誠擒之。以歸。愬待以客禮。士卒不悅。乃牒言祐為賊內應。愬恐謗先達於上。已

不及救。乃持祐泣曰。豈天不欲平此賊耶。何吾二人相知之深。而不能勝眾口也。乃械祐送京師。先密奏曰。若殺祐。則無以成功。詔以祐還。愬見之喜。執其手曰。爾之得全。社稷之靈也。諸軍討淮西四年不克。饋運疲弊。李逢吉等競言師老財竭。意欲罷兵。裴度請身自督戰。誓不與此賊俱生。上悅。使度以宰相兼彰義節度使。督諸軍討賊。李祐言於李愬曰。蔡之精兵皆在洄曲。及四境拒守。守州城者皆羸老之卒。可以乘虛直抵其城。待賊將聞之。元濟已成擒矣。愬然之。因雪假名出獵。夜半雪甚。行七十里。至州城。近城有鵝鴨池。愬令驚之以混軍聲。自布列亂後。吳少誠拒命。官軍不至蔡州。城下者三十餘年。故蔡人為不備。四鼓。愬至城下。無一人知者。李祐等鑿其城為坎。以先登。壯士從之。雞鳴。入居元濟外宅。或告元濟曰。官軍至矣。元濟尚寢。笑曰。俘因為盜。爾曉當盡殺之。又有告者曰。城陷矣。元濟起。聽於庭。聞愬軍號。令曰。常侍傳語。應者近萬人。元濟始懼。乃帥左右登牙城拒戰。時董重質擁精兵萬餘人。據洄曲。愬曰。元濟所望者重質之救耳。乃訪重質家。厚撫之。遣其子傳道持書諭重質。重質遂單騎詣愬降。元濟於城上請罪。梯而下之。監送京師。不戮一人。屯於鞠場。以待裴度。度入度入城。李愬具橐鞬出迎。拜於路左。度將避之。愬曰。蔡人頑悖。不識上下之分數十年矣。願公因而示之。使知朝廷之尊。度乃受之。愬還軍文城。裴度入蔡州。上御門受俘。斬吳元濟。賜李愬爵涼國公。以事祐為神武將軍。賜裴度爵晉國公。復入知政事。淮西既平。成德節度使王承宗聞之大懼。請以二子為質。及獻德棣二州。輸租稅。請官吏。上許之。初。淄青節度使李師道。使盜殺宰相武元衡。又擊

傷裴度首。上未暇討。及見吳元濟伏誅。大懼。奉表納質。既而悔之。表言軍情不聽納質。割地上。怒。令宣武魏博成義武甯橫海諸鎮兵共討之。李愬田弘正屢敗師道兵。師道聞官軍侵逼。發民治軍州城塹。修守備。役及婦女。民益懼且怨。都知兵馬使劉悟勒兵捕師道。與其二子斬之。函首送弘正營。弘正大喜。露布以聞。淄青等十二州皆平。自肅代以來。垂六十年。藩鎮跋扈。河南河北三十餘州。自除官吏。不供貢賦。至是盡遵朝廷約束矣。時天下既平。上寢驕侈。用皇甫鏘李吉甫而罷裴度。政治頗衰。又漸好仙佛。以方士柳泌為台州刺史。使求靈草。合長生藥。又遣中使至鳳翔迎佛骨。刑部侍郎韓愈上疏切諫。上大怒。將加愈極刑。以裴度等言。乃貶為潮州刺史。柳泌至台州。驅吏民採藥。歲餘無所得。懼而逃入山中。浙東觀察使捕送京師。皇甫鏘李道古保護之上。服其藥。日加燥渴。多躁怒。左右宦官往往獲罪有死者。人人自危。內常侍陳弘志用毒藥弑帝于中和殿。其黨共為之諱。但云藥發暴崩。在位十五年中。尉梁守謙王守澄等共立太子恒。穆宗即位于太極殿。貶皇甫鏘李道古為遠州司戶。柳泌伏誅。翰林學士李德裕吉甫之子也。以牛僧孺李宗閔嘗對策。譏切其父。恨之。宗閔又與翰林學士元稹爭進。取有隙。由是李德裕元稹為一黨。牛僧孺李宗閔李逢吉等為一黨。號為牛李二黨。更相傾軋。垂四十年。盧龍軍亂。囚節度使張弘靖。推朱克融為留後。成德兵馬使王庭湊殺節度使田弘正。魏博節度使李愬聞變。涕泣誓眾。欲討之。會疾作不果。庭湊圍牛元翼於深州。官軍救之不能進。朝廷不得已。以庭湊為成德節度使。而遣韓愈宣慰之。自是再失河北。終唐不

能復取。初柳泌既誅。方士稍復。因左右以進。上餌其金石之藥。至是疾作。崩。在位四年。子敬宗湛即位。年方十五。敬宗以昏童失德。荒淫無度。而稍能信用裴度。裴度在中書。左右忽曰。失印。聞者失色。度飲酒自如。有頃。復白。已得之。度亦不喜。或問其故。度曰。此必吏人盜之。以印書券耳。急之則投諸水。火緩之。則還故處。人服其識量。上好遊戲。狎暱羣小。嬖倖用事。善擊毬。好手搏。性復褊急。宦官小過。動遭捶撻。皆怨且懼。夜攬還宮。與宦官劉克明及擊毬將軍蘇佐明等二十八人飲酒。上酒酣入室更衣。殿上燭滅。劉克明等弑上於室內。在位二年。矯稱上旨。以憲宗第六子絳王悟權勾當軍國事。知樞密王守澄等以衛兵討克明。殺絳王。悟迎敬宗弟江王涵立之。是為文宗。時牛僧孺用。則傾李德裕。李德裕用。則傾牛僧孺。各有朋黨。互相擠援。上每歎曰。去河北賊易。去朝中朋黨難。上性儉素。聽朝之暇。惟以書史自娛。聲樂遊畋。未嘗留意。且能虛懷聽納。然而優游不斷。受制家奴。上與李訓。鄭註。謀誅宦官。既殺王守澄。因謀盡誅宦官。李訓復懼鄭註專有其功。因帥金吾衛士。先期擊之事敗。李訓。鄭註反。為宦官仇士良等所殺。自是天下事皆決於北司。宰相行文書而已。宦官氣益盛。迫脇天子。下視宰相。陵暴朝士如草芥。上有疾。少間。坐思政殿。召當直學士周墀。賜之酒。因問曰。朕可仿前代何如主。對曰。陛下堯舜之主也。上曰。朕何敢上比堯舜。所以問卿者。何如周赧。漢獻耳。墀驚曰。彼亡國之主。豈可比聖德。上曰。赧。獻受制於彊諸侯。今朕受制於家奴。以此言之。朕殆不如。因泣下霑襟。墀伏地流涕。自是不復視朝。在位十四年。崩。太子永早卒。上立敬宗子陳王成美為太子。

宦官仇士良魚弘志以其立不由己。矯詔廢而殺之。而立帝弟潁王漚為皇太弟。更名炎。遂即位。是為武帝。上英敏特達。委任能臣。以李德裕為相。澤潞節度使劉從諫卒。子劉稹秘不發喪。欲為留後。上以謀於宰相。李德裕曰。稹所恃者河朔三鎮耳。若遣重臣往諭三鎮。以河朔自艱難以來。列聖已許傳襲。與澤潞不同。即委成德鎮王元逵。魏博鎮何徽。盧龍鎮張仲武攻之。則稹必成擒矣。上從之。遣御史中丞李回宣諭河北三鎮。三鎮奉詔舉兵討澤潞。破之。邢洺磁三州降。李德裕曰。澤潞根本盡在山東。三州降。則上黨不日有變矣。上曰。郭誼。稹謀主也。必集劉稹以自贖。德裕曰。誠如聖料。未幾。誼果斬稹。收稹宗族盡殺之。函稹首以降。上餌方士金丹。漸覺有疾。而方士以為換骨。凡服金丹者。則陽必暴舉。御女多多益善。始亦甚覺壯健美快。故雖以武宗之賢。亦不悟而服之。初憲宗納李錡妾。生光王。怡怡幼時。宮中皆以為不慧。文宗以後。益自韜匿。及上疾篤。諸宦官密於禁中。定策立怡為皇太叔。更名忱。太叔見百官哀戚。裁決庶務。咸當於理。人始知有隱德焉。上在位六年崩。太叔宣宗即位。即罷李德裕不用。初武宗無后。王才人寵冠後宮。武宗欲立為后。李德裕以其族寒。無子。恐不厭天下之望。止之。武宗疾甚。顧之曰。我死汝當如何。對曰。願從陛下於九泉。武宗以中授之。武宗崩。才人即自縊。宣宗聞而矜之。贈貴妃。同葬端陵。小說家作孟才人是也。宣宗精於聽斷。用法無私。從諫如流。重惜官賞。謹飭節儉。惠愛民物。故時人號為小太宗。然以察為明。無復仁恩。自是而唐衰矣。上臨朝。接對羣臣如賓客。每宰相奏事。旁無一人立者。威嚴不可仰視。奏事既畢。忽怡然曰。

可以閑語矣。因問閭閻細事。或談宮中遊宴。無所不至。復整容申飭而後入。上餌方士李元伯等藥。疽發於背。密以第三子愛王滋屬王歸長等三人。使立之。上在位十三年崩。在軍中尉王宗實叱歸長等。責以矯詔。皆捧足乞命。乃迎長子郢王。立為太子。更名淮。取歸長等殺之。太子即位。是為懿宗。方士李元伯等伏誅。懿宗驕奢無度。淫樂不悛。車氏之亡。於茲決矣。浙東賊裘甫作亂。攻陷象山。浙東騷動。安南都護王式討平之。桂州戍卒作亂。推判官龐勛為主。眾至十萬。康承訓與朱邪赤心討平之。赤心賜姓李。名國昌。以為大同軍節度使。即李克用父也。上好奉佛。施與無度。十四年正月。遣使迎佛骨。羣臣有言。憲宗迎佛骨。尋晏駕者。上曰。生得見之。死亦何恨。上疾大漸。中尉劉行深韓文約立上少子普王儼為太子。上在位十四年崩。太子即位。年方十二。是為僖宗。僖宗年少。政在臣下。南牙北司。互相矛盾。上之為普王也。小馬坊使田令孜有寵。及即位。使為樞密。擢為中尉。上時年十四。專事遊戲。政事一委令孜。呼為阿父。除官不復關白。自懿宗以來。奢侈日甚。用兵不息。賦歛愈急。關東連年水旱。州縣不以實聞。上下相蒙。百姓流殍。無所控訴。相聚為盜。所在蠶起。濮州人王仙芝。聚眾數千。起於長垣。今直隸長垣縣是也。冤句人黃巢。少與仙芝。皆以販私鹽為事。巢善騎射。喜任俠。粗涉書傳。屢舉進士不第。遂為盜。與仙芝剽掠州縣。橫行山東。民之困於重斂者。爭歸之。數月之間。眾至數萬。飛蝗蔽天。所過赤地。從者益眾。王仙芝寇掠荆南等地。招討使曾元裕大破之於申州。殺萬餘人。降萬餘人。又破之於黃梅。殺五萬餘人。追仙芝斬之。賊將尚讓帥仙芝餘黨。悉歸黃巢。推

巢為衡天大將軍。剽掠山東湖廣河南等處。至於江南浙東。開山路七百里。攻剽福建。所至姦淫殺掠。收其精壯為兵。鎮海節度使高駢遣將擊破之。巢趣廣南。上表求為廣州節度使。朝廷不許。巢急攻廣州。陷之。左拾遺侯昌業以盜賊滿關東。而上專務遊戲。賞賜無度。田令孜專權無上。社稷將危。上疏極諫。上大怒。召昌業至內侍省。賜死。黃巢舉兵北向。眾二十餘萬。兵勢甚盛。因兩京無備。遂陷東都。破潼關。直入長安。宦官田令孜以神策兵五百奉帝自金光門出。惟福王穆王澤王壽王及妃嬪數人從行。鳳翔節度使鄭畋謁於道次。請留鳳翔。上曰。朕不欲密通巨寇。且幸興元。徵兵以圖收復。畋因刺血為表。請合諸道兵討賊。黃巢僭號。自稱大齊皇帝。殺唐宗室之在長安者無遺類。初黃巢帥眾。惟事殺掠。流而不守。至是始據地矣。田令孜勸上幸成都。從之。初碭山人朱溫碭山今江南徐州碭山縣是也。其父朱誠以五經教授鄉里。生三子。長曰全昱。次曰存。三曰溫。及誠卒。三子貧。傭食於蕭縣劉崇家。全昱無才能。為人頗長者。存與溫俱勇而有方。溫尤凶悍。崇數笞辱之。崇母獨憐之。戒家人曰。朱三非常人。汝曹善遇之。及黃巢兵起。存與溫俱從賊。黃巢攻嶺南。朱存戰死。巢陷長安。以溫東南面行營先鋒。使攻閬州。以為防禦。使守華鄧諸州。長安之陷。宦官楊光復慷慨忠義。在長安與周夔共起兵擊朱溫。敗之。遂克鄧州。朱溫守華州。高駢畏賊。偽稱風痺。不復出兵。駢召董昌於廣陵。錢鏐說昌曰。觀高公無心討賊。不若去之。昌從之。引兵入據杭州。使錢鏐取越州。昌遂徙鎮越州。以鏐知杭州事。後鏐據浙江等地為吳越王。詳見下回。時壽州屠者王緒舉眾盜據壽州。及

光州以王潮為軍正。信用之。其後王潮據有福建等地。為閩國。詳見下回。秦穆殺高駢。上以高駢都將楊行密為淮南留後。後據有江南等地。為吳王。又為南唐。詳見下回。初大同軍亂。殺防禦使段文楚。推李克用為留後。克用表求救命。朝廷不許。使李可舉討李克用。大破之。使李瑑討李國昌。敗之。國昌克用亡走。韃靼嘗曰。吾得罪天子。願效忠而不得。今聞黃巢北來。必為中原患。一旦天子赦吾罪。得與公輩南向。共立大功。不亦快乎。監軍陳景思為之代請於朝。詔如所請。首相王鐸見黃巢猖獗。而高駢為方士所愚。無心討賊。發憤請行。會諸道兵進逼長安。官軍四集。巢勢日蹙。號令所行不出同華。朱溫見巢兵勢漸弱。知其將亡。遂以華州降。詔以溫為招討副使。賜名全忠。時黃巢兵勢尚強。王鐸在河中患之。乃以墨劄召李克用。克用遂以沙陀兵一萬七千及雁門兵四萬趨河中。軍皆衣黑。賊憚之。曰。鴟軍至矣。克用以黃巢兵戰於渭南。一日三戰皆捷。諸軍繼之。巢眾大奔。巢焚宮室遁去。克用時年二十八。於諸將最少。而破黃巢。復長安。功第一。兵勢最強。諸將皆畏之。克用一目微眇。時人謂之獨眼龍。詔以克用為河東節度使。時以黃巢未平。加朱全忠為東北都招討使。黃巢雖遁。兵勢尚強。周及時溥。朱全忠俱求救於李克用。克用將蕃漢兵五萬救之。巢圍陳州。幾三百日。趙犛兄弟與之大小數百戰。雖兵食將盡。而眾心益固。克用會許汴徐兗之軍於陳州。攻尚讓於太浦。拔之。巢聞之懼。解圍而去。黃巢趨汴州。李克用等追及巢於中牟。奮擊大破之。尚讓帥眾降。黃巢收餘眾奔兗州。克用至汴州。全忠固請入城。館於上源驛。就驛置酒甚恭。克用乘酒使氣。語頗侵之。全

忠不平。薄暮罷酒。從者皆醉。宣武將楊彥洪密與全忠謀。乃連車塞路。發兵圍驛而攻之。克用絕城得出。全忠誤射彥洪。殺之。比明。克用欲勒兵攻全忠。其妻劉氏曰。此當訴之朝廷。若擅舉兵相攻。則天下孰能辨其曲直。且彼得以為辭矣。克用從之。引兵去。武甯將李師悅與尚讓追黃巢至瑕邱。敗之。巢殆盡。走至虎狼口。其甥林言斬巢兄弟妻子首以降。黃巢亂凡十年。時溥遣使獻巢首。併其姬妾。上御樓受之。其姬妾皆美婦。極天下之選。上意欲納之。因宣問云。汝曹皆勲貴子女。何為從賊。其居首者應曰。妾等從賊。不過失身。至若國家以百萬之衆。不能拒賊。失守宗祧。妾等女子。縱欲保身。不過死耳。豈能拒賊耶。上大怒。盡斬之。王鐸既平賊。實玩充積。美女成行。皆艷冶奪目。上以為義昌節度使。過魏地。魏博節度使樂從訓殺而奪之。以盜聞於朝。宦官田令孜專權。妄上殺害忠良。禁制天子。上患其專。時語左右流涕而已。李克用表請誅田令孜。詔和解之。克用不聽。進逼京城。令孜夜奉天子自開遠門出。幸鳳翔。克用還軍河中。表請大駕還宮。罪狀田令孜。請誅之。令孜請上幸興元。上不從。是夜令孜引兵入宮。劫上如寶雞。朱玫率昌符引兵追逼乘輿。天下共忿疾令孜。令孜內不自安。乃薦楊復恭為中尉。自除西川監軍。往依陳敬瑄。復恭斥逐令孜之黨。以王建為西川利州刺史。後據蜀。是為前蜀。詳見下回。詔削田令孜官爵。長流端州。令孜依陳敬瑄。竟不行。後二人俱為王建所殺。時京師再經兵火。荆棘滿城。車駕暫駐蹕於鳳翔。上疾大漸。觀軍容使楊復恭立壽王傑為皇太弟。僖宗在位十五年。崩。弟昭宗傑即位。昭宗體貌明粹。有英氣。以僖宗威令不振。朝廷日卑。

有恢復前烈之志。尊禮大臣。即位之初。天下欣欣焉。進朱全忠爵東平郡王。初李克用請討朱全忠。詔和解之。至是朱全忠請討李克用。張濬欲倚外勢以擠楊復恭。請從之。以張濬為招討使。會諸道兵討之。克用養子李存孝力過猛虎。常將騎兵為先鋒。身被重鎧。腰弓髀槊。獨舞鐵撾入陣。前破黃巢。所向無敵。至是凡河北驍將至者。存孝率數百騎。悉生擒之。葛從周朱全忠皆敗走。張濬大敗而還。李克用上表訴冤。詔復克用官爵。使歸晉陽。貶張濬為繡州司戶。濬奔依朱全忠。劉隱將兵平定廣州。上以隱為清海軍節度使。使治廣州。後為南漢。詳見下回。武安節度使劉見鋒為其下所殺。眾推馬殷為留後。上以馬殷為湖南節度使。後為楚國。詳見下回。內宦楊復恭專橫。上出為鳳翔監軍。復恭愠怒不肯行。稱疾求致仕。從之。未幾走興元。與楊守亮反。李茂貞討誅之。獻復恭與守亮書。訴致仕之由云。吾於荆榛中立壽王。纔得尊位。廢定策國老。有如此負心門生天子。進李克用。將為晉王。克用還晉陽。車駕還京師。初李存孝與李存性皆為克用養子。存性有寵於克用。妬存孝功。讒而殺之。克用痛惜。為之不視事者旬日。又存孝部將薛阿檀其勇亞於存孝。克用併殺之。自是兵勢浸弱。而朱全忠獨盛矣。崔胤與上密謀。盡誅宦官。宦官益懼。上自華州還。忽忽不樂。多縱酒。喜怒不常。左右人人自危。於是中尉劉季述王仲先等陰謀廢立。乃引兵突入宣化門。季述進曰。陛下厭倦大寶。中外羣情願太子監國。請陛下保頤東宮。乃扶上與后同輦。嬪御侍者纔十餘人。適少陽院季述以銀撾畫地數上罪數十。乃鎖其門。鎔鐵錮之。穴牆以通飲食。季述等矯詔。令太子裕監國。尋使即